

四庫全書

集部

欽定四庫全書

集部

陳文紀卷三

詳校官庶吉士臣瑚圖禮

主事銜臣徐以坤覆勘

總校官進士臣楊魁珩

校對官中書臣朱炘

謄錄監生臣汪鰲

欽定四庫全書

陳文紀卷三

明 梅鼎祚 編

蔡景歷

字茂世濟陽考城人善尺牘工草隸入陳歷員外散騎常侍兼御史中丞度支尚書

答高祖書

景歷梁時解褐諸王府佐爲海陽令侯景亂簡文帝爲景所幽景歷與南康嗣王謀挾簡文出奔事泄見執獲免因客游京口侯景平高祖爲平東將軍兼揚州刺史鎮朱方以書要之景歷對使人答書筆不停輟文不重改高祖欽賞仍更報答即板征北府中軍記室

蒙降札書曲垂引逮伏覽循回載深欣暢竊以世求名

駿行地能致千里時愛奇寶照車遂有徑寸但雲咸斯
奏自輟巴渝杞梓方雕豈眄樛樛仰惟明將軍使君侯
節下英才挺茂雄姿秀拔運屬時艱志匡多難振衡岳
而綏五嶺滌瀆源而澄九派帶甲十萬彊弩數千誓勤
王之師摠義夫之力鯨鯢式剪役不踰時氛霧廓清士
無血刃雖漢誅祿產舉朝寔賴絳侯晉討約峻中外一
資陶牧比事論功彼奚足美加以抗威克服冠蓋通於
北門整飾徐方詠歌溢於東道能使邊庭卧鼓行旅露

宿巷不拾遺市無異價洋洋乎功德政化曠古未儔諒
非膚淺所能殫述是以天下之人向風慕義接踵披衿
雜遝而至矣或帝室英賢貴游令望齊楚秀異荆吳岐
嶷武夫則猛氣紛紜雄心四據陸拔山岳水斷蚪龍六
鈞之弓左右馳射萬人之劍短兵交接攻壘若文鴛焚
艦如黃蓋百戰百勝貌貅為羣文人則通儒博識英才
偉器雕麗暉煥摘挾絢藻子雲不能抗其筆元瑜無以
高其記尺翰馳而聊城下清談奮而羸軍却復有三河

辯客改哀樂於須臾六奇謀士斷變反於倏忽治民如
子賤踐境有成折獄如仲由片辭從理直言如毛遂能
厲主威銜使若相如不辱君命懷忠抱義感恩徇己誠
斷黃金精貫白日海內雄賢牢籠斯備明將軍徹鞍下
馬推案止食申爵以榮之築館以安之輕財重氣卑躬
厚士盛矣哉盛矣哉抑又聞之戰國將相咸推引賓游
中代岳牧竝盛延僚友濟濟多士所以成將軍之貴但
量能校實稱才任使圓行方止各盡其宜受委責成誰

不畢力至如走賤妄庸人耳秋冬讀書終慙專學刀筆
為吏竟闕異等衡門衰素無所聞達薄官輕資焉能遠
大自陽九遘屯天步艱阻同彼貴仕溺於巨寇亟鄰危
殆備踐薄冰今王道中興殷憂啓運獲存微命足為幸
甚方歡飲咏是謂來蘇然皇鑒未反宛洛無曠四壁固
三軍之餘長夏無半菽之產遨遊故人聊為借貸屬此
樂土洵美忘歸竊服高義暫謁門下明將軍降已顏色
二三士友假其餘論管蒯不弃折簡賜畱欲以雞鶩廁

駕鴻於池沼將移瓦礫叅金碧之聲價昔折脅游秦忽
逢盼採擔簦入趙便致畱連今雖羈旅方之非匹樊林
之賁何用克堪但眇眇纖蘿憑喬松以自聳蠢蠢輕蚘
託驂尾而遠鴛鴦不自涯願備下走且為腹背之毛脫
充鳴吠之數增榮改觀為幸已多海不厭深山不讓高
敢布心腹惟將軍覽焉

周弘正

字思行汝南安城人顯孫梁太常
卿都官尚書入陳歷尚書右僕射

奏記梁晉安王綱

梁晉安王為丹陽尹引弘正為主簿歷司議
侍郎昭明太子薨其嗣華陽公不得立以晉
安王為皇太子弘正奏
記其抗直守正皆此類

竊聞撫謙之象起於羲軒又畫揖讓之源生於堯舜禪
受其來尚矣可得而詳焉夫以廟堂汾水殊途而同歸
稷契巢許異名而一貫出者稱為元首處者謂之外臣
莫不內外相資表裏成治斯蓋萬代同規百王不易者
也暨于三王之世寢以陵夷各親其親各子其子乃至
七國爭雄劉項競逐皇漢扇其俗有晉揚其波謙讓之

道廢多歷年所矣夫文質遞變澆淳相革還樸反古今也其時伏惟明大王殿下天挺將聖聰明神武百辟冠冕四海歸仁是以皇上發德音下明詔以大王為國之儲副乃天下之本焉雖復夏啓周誦漢儲魏兩此數君者安足為大王道哉意者願聞殿下抗伯夷上仁之義執子臧大賢之節逃玉輿而弗乘弃萬乘如脫屣庶改澆競之俗以大吳國之風古有其人今聞其語能行之者非殿下而誰能使無為之化復興於邃古讓王之道

不墜於來今豈不盛歟豈不盛歟弘正陋學書生義慙
稽古家自汝潁世傳忠烈先人決曹掾燕抗辭九諫高
節萬乘正色三府雖盛德之業將絕而狂直之風未墜
是以敢布腹心肆其愚瞽如使芻言野說少陳於聽覽
縱復委身烹鼎之下絕命肺石之上雖死之日猶生之

年

陳書 來今
通鑑作來葉

請梁武帝釋乾坤二繫啓

弘正遷國子博士啓高祖周易疑義
五十餘條又請釋乾坤二繫詔答之

臣聞易稱立象以盡意繫辭以盡言然後知聖人之情
幾可見矣自非含微體極盡化窮神豈能通志成務探
賾致遠而宣尼比之桎梏絕韋編於漆字軒轅之所聽
瑩遺玄珠於赤水伏惟陛下下日萬機匪勞神於瞬息
凝心妙本常自得於天真聖智無以隱其幾深明神無
以淪其不測至若文畫之包於六經文辭之窮於兩繫
名儒劇談以歷載鴻生抵掌以終年莫有試遊其藩未
嘗一見其渙自制七日降談裁成易道析至微於秋毫渙

曾冰於幽谷臣親承音旨職司宣授後進誅誅不無傳
業但乾坤之蘊未剖繫表之妙莫詮使一經深致尚多
所惑臣不涯庸淺輕率短陋謹與受業諸生清河張譏
等三百一十二人於乾坤二繫象文未啓伏願聽覽之
間曲垂提訓得使微臣鑽仰成其篤習後昆好事專門
有奉自惟多幸懽沐道於堯年肄業終身不知老之將
至天尊不聞而冒陳請冰谷寘懷罔識攸厝

梁武帝詔答周弘正

設卦觀象事遠文高作繫表言辭深理奧東魯絕編之
思西伯幽憂之作事逾三古人更七聖自商瞿稟承子
庸傳授篇簡湮沒歲月遼遠田生表菑川之譽梁丘擅
瑯邪之學代郡范生山陽王氏人藏荆山之寶各盡玄
言之趣說或去取意有詳略近措紳之學咸有稽疑隨
答所問已具別解知與張譏等三百一十二人須釋乾
坤文言及二繫萬幾小暇試當討論

謝東宮賜穀袍啟

或儔名麗辭等質輕霧或色華少海用寶叢臺或粲彼
三英縫茲五絨品頌歲龍祿奪春耕蒿席可亢緼袍易
足

謝梁元帝賚春秋糊屏風啟

昔琉璃見重雲母稱珍雖盡華麗有傷真朴豈若三體
五例對玩前史一字褒貶坐卧箴規無復楚臺之風得
同鄒谷之暖

謝梁元帝賚玉門棗啟

安期舊美安息高名臣金馬之榮未獲趨奉方朔之賜
遽降洪恩

謝勅賚紫鮓啓

珍韜江浦味越茗川昔聞八駿東征止收黑水之麥七
華西討才獲苦山之菜豈如兩階干舞四方來格臨朝
拱默任土爭貢

謝勅賚烏紗帽等啓

雖復魏宣二端豈能比今茲賜廣微四縫未足方其華

飾既受非望之恩方貽匪報之誚

並藝文類聚

謝賚漆枹根屨啟

蒙此慈物便得輕舉

北堂書鈔

測囚法議

梁代舊律測囚之法日一上起自晡鼓盡于二更及比部郎范泉刑定律

今以舊法測立時久非人所堪分其刻數日再上廷尉以為新制過輕請集八座丞郎并祭酒孔奐行事沈洙五舍人會尚書省詳議時高宗為安成王錄尚書集眾議之弘正為尚書左丞議及沈洙議上眾以為宜依范泉前制高宗謂沈長史議得中宜更博議左丞宗元饒請依沈議施行

凡小大之獄必應以情正言依準五聽驗其虛實豈可
全恣考掠以判刑罪且測人時節本非古制近代以來
方有此法起自晡鼓迄于二更豈是常人所能堪忍所
以重械之下危墮之上無人不屈誣枉者多朝晚二
時同等刻數進退而求於事為衷若謂小促前致實罪
不伏如復時節延長則無憾妄歟且人之所堪既有彊
弱人之立意固亦多途至如貫高榜笞刺熬身無完膚
戴就熏針並極困篤不移豈關時刻長短掠測優劣夫

與殺不辜寧失不經罪疑惟輕功疑惟重斯則古之聖王垂此明法愚謂依范泉著制於事為永

舍人盛權議

比部范泉新制尚書周弘正明議咸允虞書惟輕之旨殷頌敷正之言竊尋廷尉監沈仲由等列新制以後凡有獄十一人其所測者十人款者惟一愚謂染罪之囚獄官宜明加辯析窮考事理若罪有可疑自宜啓審分判幸無濫測若罪有實驗乃可啓審測立此則枉直有

分刑宥斯理范泉今牒述漢律云死罪及除名罪證明
白考掠已至而抵隱不服者處當列上杜預注云處當
證驗明白之狀到其抵隱之意竊尋舊制深峻百中不
款者一新制寬優十中不款者九參會兩文寬猛是異
處當列上未見釐革愚謂宜付典法更詳處當列上之
文

衡陽王長史沈洙議

夜中測緩急易欺兼用晝漏於事為允但漏刻賒促今

古不同漢書律歷何承天祖冲之脰之父子漏經並自
開鼓至下鼓自晡鼓至開鼓皆十三刻冬夏四時不異
若其日有長短分在中時前後今用梁末改漏下鼓之
後分其短長夏至之日各十七刻冬至之日各十二刻
伏承命旨刻同勒令檢一日之刻乃同而四時之用不
等廷尉今牒以時刻短促到罪人不款愚意願去夜測
之昧從晝漏之明斟酌今古之間參會二漏之義捨秋
冬之少刻從夏日之長晷不問寒暑並依今之夏至朝

夕上測各十七刻比之古漏則上多昔四刻即用今漏則冬至多五刻雖冬至之時數刻侵夜正是少日於事非疑庶罪人不以漏短而為捍獄囚無以在夜而致誣求之鄙意竊謂允合

尚書左丞宗元饒議

竊尋沈議非頓異范正是欲使四時均其刻數兼斟酌其佳以會優劇即同牒請寫還刪定曹詳改前制

周弘讓

弘正弟博學多通始仕不得志隱句容茅山既為庾景中書侍郎承聖中為國子祭

酒入陳天嘉初以白

衣領太常光祿大夫

宋齊故事奏

陳初武帝詔求宋齊故事太常卿周弘讓奏帝遂依之

齊氏承宋武用元徽舊式宗祀朝饗奏樂俱同唯北郊之禮頗有增益皇帝入壇門奏永至飲福酒奏嘉胙太尉亞獻奏凱容埋牲奏幽隸帝還便殿奏休成衆官入出竝奏肅咸此乃元徽所闕永明六年之所加也唯送神之樂宋孝建二年秋起居注云奏肆夏齊永明中改

奏昭夏

杜氏通典

與徐陵薦方圓書

吾荷朝恩得安丘壑身名兩泰夫復奚言但願沐浴堯
風遨遊舜日安服飽食以送餘齒然性靈未能灰弭其
間復須友生言晤後來英俊竝出方為時生林谷之中
鮮逢遐逸惟趙郡方圓栖遲天目年過強仕不慕時榮
文史足用學藝優敏中歲暫游宛洛蒙弟識異其人方
儲之屑衣冠未絕雅奉閒逸得性丘林與吾朋遊積有
年歲今復同在巖壑畢志風雲琴按清商詩題空谷比

幽貞道缺考槃絕詠賁五履二兩爻無聞方今公旦作
輔億兆攸賴激貪懲競儻自圓起弟以搜揚佐世水鏡
求賢脫能登此仄陋綸言是屬翹弓遠賁則山谷咸勸
足令廉風復振懦夫能立豈不弘哉圓若蒙此旌招未
必不鑿坏而達於廊廟之用脫不能賁然來思而於遐
讓之道於斯為貴恐弟未究東川人士聊復起予今言
吾家上宰之貴無以微裨萬一此舉脫復入聽少得不

負夙心周弘讓白

綸一作論

徐陵答周處士書

弘讓頻徵不出晚仕侯景彭城劉孝先亦辭
辟命在蜀為武陵王紀世子諮議參軍二隱
並獲譏於代按陵此答意頗微有所謂
弘讓本居茅山北云天目蓋在陳時也

辱去年三月二十七日告仰披華翰甚慰翹結承歸來
天目得肆閒居差有美玉之俱仙非無孟光之同隱優
游俯仰極素女之經文升降盈虛盡軒皇之圖藝雖復
考盤在阿不為獨宿詎勞金液惟飲玉泉比夫煮石紛
紜終年不爛燒丹辛苦至老方成及其得道冥真何勞

逸之相懸也又承有方生亦在天目理當仰稟明師摠
斯秘要豈如張陵弟子自墜高巖孫泰門人競投滄海
何其樂乎聖朝虛心版築尚想丘園若彼能赴嘉招便
當謹申高命但其人往歲亦望至京師觀此風神確乎
難拔故以忘懷爵祿詎持犧牲之談高視公卿獨騁蜡
蛭之訓所恐有道三辟公車十徵若斯者終當不屈此
既然矣請復詳言昔楚國兩龔同時紆組漢陰二老相
携抱甕兄之幽貞若其鑿坯負石方同形影結綬彈冠

無容越楚況乎糞土變龍羶臊名器已所不欲非應及人忽承來音良以多惑何則賴陽巢父不曾令薦許由商洛園公未聞求徵綺季斯所未喻高懷而躊躇於矛楯也惟遲山阿近信更惠芳音如或誠言謹便聞奏第風勞比劇不復多呈徐君白

並文苑英華
一作羌便一作使

周弘直

字思方弘讓弟梁昌州刺史
入陳歷太常卿光祿大夫

遺家疏

弘直遇疾且卒
遺疏勅其家

吾今年已來筋力減耗可謂衰矣而好生之情曾不自覺惟務行樂不知老之將至今時制云及將同朝露七十餘年頗經稱足啓手告全差無遺恨氣絕已後便買市中見材材必須小形者使易提挈歛以時服古人通制但下見先人必須備禮可著單衣裙衫故履既應侍養宜備紛悅或逢善友又須香煙棺內惟安白布手巾麝香爐而已其外一無所用

杜之偉

字子大吳郡錢塘人仕梁邵陵王刑獄叅軍陳大匠卿遷大中大夫

上高祖求解著作啓

初高祖為丞相之偉補記室叅軍遷中書侍郎領大著作及受禪除鴻臚卿啓求解著作優赦不許

臣以紹泰元年忝中書侍郎掌國史于今四載臣本庸賤謬蒙矜識思報恩獎不敢廢官皇厯惟新驅馭軒昊記言記事未易其人著作之材更宜選衆御史中丞沈炯尚書左丞徐陵梁前兼大著作虞荔梁前黃門侍郎孔奐或清文膽筆或彊識稽古遷董之任允屬羣才臣

無容遽變市朝再妨賢路堯朝皆讓誠不可追陳力就
劉庶幾知免

沈炯

字初明吳興武康人梁御史中丞入陳加通直散騎常侍

為王僧辯答貞陽侯書

徐陵傳淵明往復致書皆陵詞王僧辯答書文

苑英華亦作陵為僧辯答非也按沈炯傳僧辯羽檄軍書皆出於炯

孤子僧辯頓首頓首席威卿反命具有奉答馬嵩仁至
又奉去月二十八日誨增用傾悚秦為不道西都失守
率土臣妾莫不驚惶喪君有君實惟典禮繼世嗣厯明

於通誥所以百辟羣司四方岳牧共立大計僉議所歸
故紹晉安殿下用傳寶祚樹立之宜無由遠謀鄰國足
下宗枝蕃戚德譽早隆既身限北庭事隔匡贊今者借
助齊主揚旆南轅但嗣守洪基即既其主若阿衡帝載
誠所推揖弘佐中興誰曰不可所望齊朝永存信誓謹
當命北舟人奉迎麾駕無容進枉齊兵遠於江表仰冀
弼諧時政用極奮庸但江東之地數千餘里民附國險
水陸衿帶若舊京從命揚徐承旨又恐西南之地二十

餘州不即威懷容為齊國之患而糧裹之宜更遲動靜
祇展之日冀在一二謹因馬嵩仁并遣貞威將軍通直
郎散騎常侍馬瑱口宣諮述孤子王僧辯頓首頓首

為王僧辯重答貞陽侯啓

僧辯頓首頓首白席威卿至奉今月五日誨披函伸紙
號耻交哀天未悔禍地維重絕九縣沸騰四海悲憤嗣
主欽明濬哲齊聖廣淵體自宸極受命文祖主梁祀者
非此而誰且年倍漢昭弗明上官之詐德踰姬誦彌昭

周旦之誠今海内衣冠中朝卿士或南陽舊隸官成天
監之初代邸故臣榮光承聖之始莫不人竭其力爭求
効命輸心嗣主以報先帝之恩今荆陝淪覆正是江北
數縣即東南藩翰萬里而遙主甲治兵舳艫相接長波
天限方漢城池修德綏民中興可待孤子本以庸懦加
復窮喘且平生素蓄志不在位世蒙朝寵身實許國武
皇擢之千里先主申其三顧因此踰濫遂居端右屬天
步艱難寄深憂積方欲詢于髦傑採之輿阜同康時務

其贊皇猷一彼車書刷茲讎耻然後守其侯服歸老赤
松至如今日使須白事披奉來誨承彼送還今璇枝令
威播越秦虜明公儻能入朝同獎王室伊呂之任僉曰
仰歸寧不副茲乃席濟扶匡救若斯言不渝更聽後旨
便遣鷁舟虹舸奉迎麾旆但閱來朝意在主盟今江東
所奉彼屬披圖未蒙朝意鄭拒子忽左史是之漢背劉
襄班書稱允況屬疎於昔彌不敢聞命謀期通識賜亮
此誠孤子王僧辯頓首頓首

未蒙朝意一作未
蒙朝音疏耻有誤

為王僧辯奉貞陽侯啓

裴之橫敗績僧辯遂謀納
淵明仍定君臣之禮啓曰

自秦兵寇陝臣便營赴援纔及下船荆城陷沒即遣劉
周入國具表丹誠左右勲豪初竝同契周既多時不還
人情疑阻比冊降中使復遣諸處詢謀物論參差未甚
決定始得侯瑱信示西寇權景宣書令以真跡上呈觀
視將帥恣欲同泰若一朝仰違大國臣不辭灰粉悲梁
祚永絕中興伏願陛下便事濟江仰藉皇齊之威憑陛

下至聖之略樹君以長雪報可期社稷再輝死且非差
請押別使曹冲馳表齊都續啓事以聞伏遲拜奉在促
為王僧辯重奉貞陽侯啟

員外常侍姜勗還奉勅伏具動止大齊仁義之風曲被
鄰國卹災救難申此大猷皇家枝戚莫不榮荷江東冠
冕俱知憑賴今軟不忘信信實由衷謹遣臣第七息顯
顯所生劉并弟子世珍往彼充質仍遣左民尚書周弘
正至歷陽奉迎艫舳浮江俟一龍之渡清宮丹陛候六

傳之入萬國傾心同榮晉文之反三善克宣方流宋昌
之議國祚既隆社稷有奉則羣臣竭節報厚施於大齊
戮力展愚効忠誠於陛下今遣吏部尚書王通奉啓以
聞

為王僧辯與陳武帝盟文

侯景之逆浮江西寇梁元帝承制以僧辯

為大都督入援累破其軍至江州武帝亦以都督率衆出南江至湓口與僧辯會於白茅灣登壇盟誓皆淚下霑襟辭色慷慨遂共誅景時沈炯從僧辯為其文

賊臣侯景凶羯逆天無狀構造姦惡違背我恩義

破掠我國家毒害我生民移毀我社廟我高祖武皇帝
靈聖聰明光宅天下勛勞兆庶亭育萬民如我考妣五
十所載哀景以窮見歸全景將戮之首置景要害之地
崇景非次之榮我高祖於景何薄我百姓於景何怨而
景長戟彊弩陵蹙朝廷鋸牙郊甸殘食含靈剝肝斲趾
不厭其快曝骨焚尸不謂為酷高祖菲食卑宮春秋九
十屈志凝威憤終賊手大行皇帝溫嚴恭默不守鴻名
於景何有復加忍毒皇枝緼抱已上總功以還窮力極

俎既屠且膾豈有率土之濱謂為王臣食人之未飲人之水忍聞此痛而不悼心況臣僧辯臣霸先等荷稱國藩湘東王臣諱泣血銜哀之寄摩頂至足之恩世受先朝之德身當將相之任而不能瀝膽抽腸共誅姦逆雪天地之痛報君父之仇則不可以稟靈含識戴天履地今日相國至孝玄感靈武斯發已破賊徒獲其元帥止餘景身尚在京邑臣僧辯與臣霸先協和將帥同心共契必誅凶豎尊奉相國嗣膺鴻業以主郊祭前途若有

一功獲一賞臣僧辯等不推己讓物先身帥衆則天地
宗廟百神之靈共誅共責臣僧辯臣霸先同心共事不
相欺負若有違戾明神殛之

奏漢武帝表

炆仕梁元帝領尚書左丞荊州陷
為西魏所虜授儀同三司嘗經漢

武通天臺為表奏之陳已思歸之意其夜夢
有宮禁之所兵衛甚嚴聞有人言甚不惜放

卿還少日
便獲東歸

臣聞橋山雖掩鼎湖之靈可祠有魯遂荒大庭之迹無
泯伏惟陛下降德猗蘭纂靈豐谷漢道既登神仙可望

射之果於海浦禮日觀而稱功橫中流於汾河指柏梁
而高宴何其樂也豈不然歟既而運屬上仙道窮晏駕
甲帳珠簾一朝零落茂陵玉盃遂出人間陵雲故基共
原田而撫撫別風餘趾帶陵阜而茫茫霸旅縲臣能不
落淚昔承明既厭嚴助東歸駟馬可乘長卿西迈恭聞
故實竊有愚心泰稷非馨敢望微福但雀臺之弔空愴
魏君雍丘之祠未光夏后瞻仰煙霞伏增悽戀

陳書無
後六句

見南史 南史既荒作遂荒樂也作樂
甚宛出作遂出趾作跡既厭作見厭

為王僧辯奉梁元帝勸進表

時景臨京城元帝為湘東王鎮荆

州承制拜僧辯安東將軍江州刺史率衆軍討景所至皆拔及聞簡文帝試奉表勸進令再辭讓明年景誅僧辯等又奉表始即位於江陵陳書沈炯傳僧辯令炯製表其文甚工當時莫有能逮者

衆軍薄伐塗次九水即日獲臨城縣使人報稱侯景弑
逆皇帝賊害太子宗室在寇庭者竝罹禍酷六軍慟哭
三辰改曜哀我皇極四海崩心我大梁纂堯構緒基商
啓祚太祖文皇帝狗齊作聖肇有六州高祖武皇帝聰

明神武奄龕天下依日月而和四時履至尊而制六合
麗正居貞大橫固祉四葉相係三聖同基蠹爾凶渠遂
憑天邑閭闔受白登之辱象魏致堯城之疑雲展承華
一朝俱酷金楨玉幹莫不同冤悠悠彼蒼何其罔極臣
聞喪君有君春秋之茂典以德以長先王之通訓少康
則牧衆撫職祀夏所以配天平王則居正東遷宗周所
以卜世漢光以能捕不道故景歷重昌中宗以不違羣
議故江東可立儔今考古更無二謀伏惟陛下至孝通

幽英武靈斷當七九之厄而應千載之期啓殷憂之明
而居百王之會取威定霸嶮阻艱難建社治兵載循古
道家國之事一至於斯天祚大梁必將有主軒轅得姓
存者二人高祖五王代實居長乘屈完而陳諸侯拜子
武而服大輅功齊九有道濟生民非奉聖明誰嗣下武
臣聞日月貞明太陽不可以闕照天地貞觀乾道不可
以久惕黃屋左纁本為億兆而尊鸞輅龍章蓋以郊禋
而貴寶器存乎至重介石慎於易差黔首豈可少選無

君宗祏豈可一日無主伏願陛下掃地升中柴天改物
事迫凶危運鍾擾攘蓋不勞宗正奉詔博士擇時南面
即可居尊西向無所讓德四方既知有奉八百始可同
期殘寇潛居器藏社處乾象既傾坤儀已覆斬莽輓車
燒卓照市廓清函夏正為瑩陵開雪宮闡庶存鍾鼎彼
黍離離伊何可言陛下繼明闡祚即宮舊楚左廟右社
之制可以權宜五禮六樂之容歲時取備金芝九莖瓊
茅三脊要衛率職尉候相望坐廟堂以朝四夷登靈臺

而望雲物禪梁甫而封泰山臨東濱而禮日觀然後與
三事大夫更謀都鄙左纏右澗夾碁可以為居抗殿疏
龍惟王可以在鎬何必勤勤建業也哉臣等不勝控款
之至謹拜表以聞

勸進第二表

紫宸曠位赤縣無主百靈聳動萬國回皇雖醉醒相扶
同歸景毫式歌且誦總赴唐郊猶懼陛下俛首潛然讓
德不嗣傳車在道方慎宋昌之謀法駕已陳尚杜耿純

之勸岳牧翹首天民累息臣聞星回日薄擊雷鞭雷者
之謂天岳立川流吐霧蒸雲者之謂地苞天地之混成
洞陰陽之不測而以裁成萬物者其在聖人乎故云天
地之大德曰生聖人之大寶曰位黃屋廟堂之下本非
獲已而居明鏡四衢之樽蓋由應物取訓伏惟陛下稽
古文思英雄特達比以周旦則文王之子方之放勛則
帝摯之季千年旦暮可不在斯庭闕湮七鐘鼎淪覆嗣
膺景歷非陛下而誰豈可使赤眉更立盆子隗囂託置

高廟陛下方復從容高讓用執謙光展其矯行偽書誣
罔正朔見機而作斷可識矣匪疑何卜無待著龜日者
公卿失馭禍纏霄極戾景憑陵姦臣互起率戎伐潁無
處不然勸明誅晉側足皆爾刁斗夜鳴烽火相照中朝
人士相顧銜悲涼州義徒東望殞涕慄慄黔首將欲安
歸陛下英略緯天沈明內斷橫劍泣血枕戈嘗膽農山
圯下之策金匱玉鼎之謀莫不定美宸帷決勝千里擊
靈龜之鼓而建翠華之旗驅六州之兵而總九伯之伐

四方雖虞一戰以霸斬其鯨鯢既章大戮荷校滅耳莫
匪姦回史不絕書府無虛月自洞庭安波彭蠡底定文
昭武穆芳若椒蘭敵國降城和如親戚九服同謀百道
俱進國耻家怨計期就雪社稷不墜繫在聖明今也何
時而申帝啓之避凶危若此方陳泰伯之辭國有具臣
誰敢奉詔天下者高祖之天下陛下者萬國之歡心萬
國豈可無君高祖豈可廢祀即日五星夜聚八風通吹
雲煙紛郁日月光華百官象物而動軍政不戒而備飛

艫巨艦竟水浮川鐵馬銀鞍陵山跨谷英傑接踵忠勇
相顧湛宗族以酬恩焚妻子以報主莫不覆楯銜威提
斧擊衆風飛電耀志滅凶醜所待陛下昭告后土虔奉
上帝廣發明詔師出以名五行夕返六軍曉進便當盡
司寇之威窮蚩尤之伐執石趙而求壘斬姚秦而取鐘
修掃瑩陵奉近宗廟陛下豈得不仰存國計俯從民請
漢宣嗣位之後即遣蒲類之軍光武登極既竟始有長
安之捷由此言之不無前準臣等或世受朝恩或身荷

重遇同休等戚自國刑家苟有腹心敢以死奪不任懷
懷之至謹重奉表以聞

勸進第三表

大寶三年三月王僧辯等平侯景傳首江陵又奉表勸進至冬十一

月即位

臣僧辯等言衆軍以今月戊子惣集建康賊景烏伏獸
窮頻擊頻挫奸竭詐盡深溝自固臣等分命將士百道
同趨突騎短兵犀函鐵楯結隊千羣持戟百萬止紂七
步圍項三重轟然大潰羣兇四滅京師少長俱稱萬歲

長安酒食於此價高九縣雲開六合清朗矧伊黔首誰
不載躍伏惟陛下咀痛茹哀嬰憤忍酷自紫庭絳闕胡
塵四起孺垣好時冀馬雲屯泣血臨兵嘗膽誓衆而吳
楚一家方與七國俱反管蔡流言又以三監作亂西涼
義衆阻秦塞而不達并州遺民跨飛狐而見絕豺狼當
路非止一人鯨鯢不梟倏焉五載雄武克振怨耻並雪
永尋霜露伊何可勝臣等輒依故實奉修祖廟使者持
節分告園陵嗣君升遐龍輜未殯承華掩曜梓宮莫測

並隨局備辦禮具凶荒四海同哀六軍袒哭聖情孝友
理當感慟日者百司羣岳仰祈宸鑑以析珪之功既歸
有道當璧之禮允屬聖明而優詔謙沖竄然凝邈飛龍
可躋而乾爻在四帝閭云呬而閭闔未開謳歌載馳是
用翹首所以越人固執燠丹穴以求君周民樂歸越岐
山而事主漢王不即位無以貴功臣光武止蕭王豈謂
紹宗廟黃帝迷於襄城尚訪治民之道放勛入於姑射
當使罇俎有歸伊此儻來豈聖人所欲帝王應運不獲

已而然伏讀璽書尋諷制旨領懷物外未奉慈衷陛下日角龍顏之姿表於狗齊之日彤雲素靈之瑞基於應物之初博覽則大哉無所與名深言則晁乎文章之觀忠為令德孝實動天加以英威茂略雄圖武策指麾則丹浦不戰顧眄則阪泉自蕩地維絕而重紐天柱傾而更植鑿河津於孟門百川復啓補穹儀以五石萬物再生縱陛下拂袵衣而遊廣成登弇山而去東土羣臣安得仰訴兆庶何所歸仁况郊祀配天罍觴禮曠齊宮

清廟匏竹不陳仰望鸞輿匪朝伊夕瞻言法駕載渴且
饑豈可久稽衆議有曠彝典況舊邦凱復函洛已平高
奴櫟陽宮館雖敗滎河清洛佳氣猶存臯門有亢甘泉
四敬土圭測景仙人承露斯蓋九州之赤縣六合之樞
機博士奉圖書而稍還太常定禮儀而已列豈得不揚
清警而赴名都振玉鑾而旋正寢昔東周既遷鎬京遂
其不復長安一亂陝洛永以為居夏禹以萬國朝諸侯
文王以六州匡天下方之跡基百里劒杖三尺以殘楚

之地抗拒六戎一旅之卒剪夷三叛坦然大定御辯東
歸解五牛於冀州秣六馬於譙郡緬求前古其得此歟
對揚天命何所讓德有理存焉敢重祈奏臣僧辯等誠
惶誠恐頓首頓首死罪死罪

為百官勸進陳武帝表

臣聞春榮秋落四時所以迭代金行水流五德所以互
序昔陶唐告終有虞氏作漢魏禪讓晉宋以之登庸夫
有非常之功有非常之賞能利天下者受天下之利陞

下造化之功日用之德褰裳去之物誰仰訴頃五星夜
聚八風通吹豐露呈甘御雲舒簇白狼遠至素雉朝飛
天意顯然靈貺可覩

上陳文帝陳情表

炯為御史中丞以母老
表請歸養帝詔答之

臣嬰生不幸弱冠而孤母子零丁兄弟相長謹身為養
仕不擇官承襲朝命偶在亂世冒危履險自死輕生妻
息誅夷昆季屠滅但餘老母得逢興運臣母妾劉今年
八十有一臣叔母妾丘七十有五私門弟姪故自無人

妾丘兒孫又久亡滅兩家侍養餘臣一人前帝知臣之
孤孀眷臣以州里不欲使頓居草萊又復矜臣溫清所
以一年之內再三休沐臣之屢披丹款頻冒宸鑒非欲
苟違朝廷遠離畿輦一者以年將六十湯火居心每
跪讀家書前懼後喜溫枕扇席無復成童二者職居葵
憲邦之司直若自虧身體何問國章前德綢繆始許哀
放內侍近臣多悉此旨正以選賢與能廣求明哲趙趙
往苒未始取才而上玄降戾奄至今日德音在耳墳土

遽乾悠悠昊天哀此罔極兼臣私心煎切彌迫近時悽
懷之祈轉忘塵觸伏惟陛下睿哲聰明嗣興下武刑于
四海弘此孝治寸管求天仰歸惟展有感必應實望聖
明特乞霈然申其私禮則王者之德覃及無方矧彼翔
沈孰非涵養

文帝詔答

省表具懷卿譽馳威雒情深宛沛日者理切倚閣言歸
異域復牽時役遂乖侍養雖周生之思每欲棄官戴禮

垂文得遺從政前朝光宅四海勛勞萬幾以卿才為獨
步職居專席方深委任屢屈情禮朕嗣奉洪基思弘景
業顧茲寡薄兼纏哀疚實賴賢哲同致雍熙豈便釋簡
南闡解紱東路當令馮親入舍荀母從官用覩朝榮不
虧家禮尋勅所由相迎尊累使卿公私得所竝無廢也
為陳太傅讓表

奏六代之舞不能祚天具百神之歌無以動聖延首當
閣轉增危慄百川沸騰百室如燬釋位同謀諸侯摠至

盟書會府餘臣一人若使幅巾衡巷口絕平吳朝遊赤
松暮過濟北出就侯服入褫龍章則四郊有壘誰守社
稷如其雄戟在前強弩自衛負孺子之圖飾緣鵲之鼎
軍威重於護將國禮貴於寒門則臣道尚卑孰云非逼
臣所以出謝公卿入訓妻子拜長陵之園謁太祖之廟
不以九族違恩義不以百姓負國家所期陛下與北極
同壽朝廷與南山同固

為周儀同失律後復官讓表

日者駭驚鄭馬害在晉軍獄囚悲其夜數縲人切其曉
奏危光似燭察命如絲云誰之尤自貽其咎假令誅以
妻子戮及墳墓漢非負德陵實孤恩況伏鎖俛眉遂受
淮陰之間吞聲飲恨不與臧洪共死陛下憐而宥之伊
臣豈不獨愧喪其子弟六謝父兄百萬之師千夫有長
問臣安在誰曰董司魂遊奉高不知何對

為周弘正讓太常表

臣聞玉帛雕楹不取材於蟠木丹青繡黼豳龍衮冕於蘿

辟何則適用各有所宜朝野不可一旨叔孫之分定禮儀倍資典實刁協之躬為唱引豈易其儀倘賓主闕對封禪失儀責以司存云誰之咎況南史執簡轉見違才

君舉必書尤難妄冒

賓主闕對御覽作九賓闕相

太極殿銘

臣聞在天成象紫宮所以昭著在地成形赤縣居其區宇太極殿者資兩儀之意焉大壯顯其全模土圭測其正影周曰路寢漢稱前殿雖名號參差其實一也主上

未明求衣日盱眙食墮樂壞禮造次留神漢陞秦除莫
不葺復而此殿興造累歲未成外遣戎機內憂民力劬
勞深慮荏苒移時至陳永定六合既清五禮稍備雕楹
玉鳥華榱璧璫揆之有日而猶一柱梗楠豫章地淪外
寇楚材晉用非復我求既而新亭前江有流查甚壯盤
根錯節枝葉蔥蒨津人以聞正堪時用於是將作受詔
冬官奉職百工並作屢降乘輿匠石磨礪必經天旨儉
而不固泰而不奢億兆填填而樂成也曾未數旬煥然

雲構昔晉朝繕造文杏有闕梅梁瑞至畫以標花自是
迄今又獲神物即樟樹焉殿之某間即某柱是也銘曰
軒轅狹堂夏后卑宮文來質往蹇產彌崇體制八都開
茲萬戶灼爍雄梁徘徊大廡壁月宵懸卿雲晝聚豈伊
開陽飛來應柱嘉辰令月新寢告成青槐赤棘郎將司
兵翠被負辰百辟公卿鐘鼓八佾簫韶九成庸臣再拜
天子萬齡

太尉始興昭烈王碑銘

古者帝王之興莫不崇建親屏泰伯讓而退封武王終
而受號則有之矣至若勒功鼎鼐銘德太常清廟尊乎
國家揚名顯乎子弟在昭烈王見之焉若夫嫫水遙源
石磬遐集五絲作而詠南風八世興而和鳴鳳籍帝王
之基居正卿之族有由來矣孔融汝穎之論許其少多
傳暢諸公之書頗有賢哲自漢至魏涉江而東縣邈蟬
聯言之者舊皇上革命應運大啓邦國麟趾盤石之宗
固宜金楨玉幹之戚畢封文叔掩被之悲無泯仲謀援

鞍之慟逾切乃封始興郡王永定元年下詔曰天倫所
感義本因心名器追崇則惟恒典亡兄梁故南充州刺
史長城縣公德範沈邃風度寬厚性與天通深乎靡測
昔彈冠入仕譽重城華宣力艱難遂顧洪業雖時非季
漢勢異桓王海內挹其風流生民懷其大德者矣朕受
天明命爰膺寶曆言尋永往興慕增懷可奉贈太尉公
昔之密戚近親宗英令德若河間之不羣沛獻之受象
東平之樂善陳思之藻麗實聞之也未有身死忠貞名

存前代若王之義烈者銘曰稽古帝舜重瞳有裔曰陳
祚土纂虞之系騰波汝頴承流嫺汭四岳有後六奇獻
計惟寔惟忠卿長羣公浮舟震澤佳氣葱葱岐周七十
商亳百里婉婉中陽帝出攸止太常景皇季孫讓子天
下不踐間之惇史入孝出忠清輝何已苞指周藏風流
懿德言爲世範行成士則名山可鐫豐碑易勒惜哉往
矣殞身凶慝鼎命既遷山河是始光啓代郡德表永祀
周以別功魯侯戾止禮茂廟堂恩加松杞

武帝哀策文

望三靈而標目躋九地而崩心哭仍几之將撒慟祖宅
之虛斟黃屋祔而白日掩紫極涵而浮雲陰其辭曰悠
悠嫺水鬱鬱姚墟惟帝之系在唐作虞正卿之後握此
靈符雕雲布族祥星結樞負茲大鏡未拾遺珠爰初發
跡斬蛇鞠旅大定番禺載戡海渚承繫而運席卷中流
王室如燬乃合諸侯負鐵誓衆釋位同謀俱登涿鹿實
斷蚩尤道濟一匡功歸四履爰愍百官訓于天子儻來

有運事非獲已翠龜負字赤雀銜書謳歌適夏禮樂遷
虞負宸正位升壇受圖二儀協序五緯同符門歌麟趾
室詠騶虞奉常定日太卜蠲時升中備物方告雍熙天
甘玉露地秀金芝休禎未答靈貺徒欺吏求穆卜詔絕
良醫義蹕失御天街褫蹕夏采升榮宮車宴出洞閨移
凶充庭罷吉閉宵管之窮燈去昭昭之遊日歸大暮之
不暘降幽宮而長畢巫咸筮吉容成戒期文衛如在葆
鐸相悲去畢陌而東顧望橋山而路遲臣攀龍而尚在

寬過沛而何之侍低昂之靈壽奉寂寂之空帷銅爵沒
於修松平陵隱於深栢節鼙鼓之哀音燎燿火於通夕
薤露落而暮日寒玄霜凝而壟草白銘功德於旂常被
徽音於鐘石迴天儀於清廟祔祖考而來格播茂實與
英聲鬱氛氲於宗祏

祭梁吳郡袁府君文

夫宮鳴徵應響韻相趨桂馥蘭芬期臭在斯道合一朝
豈忘千載日者明德世彥振纓王室坐嘯大邦顯治巨

麗竊以不敏出宰句吳上郡下邑都城接雒雖王事靡
盥無失豫遊窺洞庭於五湖登姑蘇於九曲身後之事
一至於斯今者長樂未央已夾櫟里之墓公宮魯庫非
復少昊之墟成土一棺未知何託解劍絮漿轉增歎歎
歸魂賦序

古語稱遊魂升極周易有歸魂卦屈原著招魂篇故知

魂之可歸其日已久余自長安反乃作歸魂賦

張種

字士苗吳郡人仕梁歷御史
中丞入陳終金紫光祿大夫

與沈炯書

虎丘山者吳岳之神秀者也雖復峻極異於九天隱磷
殊於太一衿帶城傍獨超衆嶺控繞川澤顧絕羣岑若
其峰崖刻削窮造化之瑰詭絕澗杳冥若鬼神之髣髴
珍木靈草茂瓊枝與碧葉蜚禽走獸必負義而膺仁是
以歷代高賢輕舉栖託梵臺雲起寶刹星懸自非玉牒
開祥金精溫耀豈其神恠若此者乎


起一作越

沈炯答張種書

若乃三江五湖洞庭巨麗寫長洲之茂苑登九曲之層
臺山高水深雲蒸霧吐其中之秀異者實虎丘之靈
阜焉冬桂夏柏長蘿修竹靈源祕洞轉側超絕遠澗

深崖交羅戶穴

並藝文類聚
崖一作巖



陳文紀卷三

欽定四庫全書

集部

陳文紀卷四

詳校官庶吉士

臣瑚圖禮

主事銜

臣徐以坤覆勘

總校官進士

臣楊懋珩

校對官中書

臣朱

烜

謄錄監生

臣汪

緣

欽定四庫全書

陳文紀卷四

明梅鼎祚編

徐陵

字孝穆東海鄭人擢子由梁入陳歷遷左光祿大夫太子少傅一

在北齊與齊僕射楊愔書

愔字遵彥弘農華陰人歷尚書令封開封

王見

誅

陵仕

梁歷通直散騎常侍使魏會齊受魏禪

元帝

承制於江陵復通使於齊陵累求復命

拘留

不遣乃致書於愔竟不報後隨貞陽侯

蕭淵明

還入仕陳此書見陳書文苑英華

異者

互注

叩頭叩頭夫一言所感凝暉照於魯陽一志冥通飛泉湧於疏勒況復元首康哉股肱良哉鄰國相聞風教相期者也天道窮剝鍾亂本朝情計馳惶公私哽懼而骸骨之請徒淹歲寒顛沛之祈空盈卷軸是所不圖也非所仰望也執事不聞之乎昔分鼇命鴈之世觀河拜洛之年則有日烏流災風禽騁暴天傾西北地缺東南盛旱圻三川長波含五嶽我大梁應金圖而有九纂玉鏡而猶屯何則聖人不能為時斯固窮通之恒理也至如

荊州刺史湘東王機神之本無寄名言陶鑄之餘猶為
堯舜雖復六代之舞陳於總章九州之歌登於司樂虞
變拊石晉曠調鍾未足頌此英聲無以宣其盛德者也
若使郊禋楚翼寧非祀夏之君戡定艱難便是匡周之
霸豈徒幽王徙雍暮月為都姚帝遷河周年成邑方今
越裳藐藐馴雉北飛肅春茫茫風牛南偃吾君之子含
識知歸而答旨云何所不投身斯其未喻一也又晉熙
等郡皆入貴朝去我尋陽經塗何幾至於鐺鐺曉漏的

的宵烽隔淑浦而相聞臨高臺而可望泉流寶盃遙憶
湓城峰號香爐依然廬嶽日者鄱陽嗣王治兵滙派屯
戍淪波朝夕牋書春秋方物吾無從以躡屩彼何路而
齊鑣豈其然乎斯不然矣又近者邵陵王通和此國郢
中上客雲聚魏都鄴下名卿風馳江浦豈盧龍之徑於
彼新開銅駝之街於我長閉何彼途甚易非勞於五丁
我路為難如登於九折地不私載何其爽歟而答旨云
還路無從斯所未喻二也晉熙廬江義陽安陸皆云歟

附非復危邦計彼中途便當靜宴自斯以北桴鼓不鳴

自此以南封疆未壹

英華云自斯以北桴鼓不鳴鄰如憾所通自此以南玉靈未缺

如

其境外脫殞輕軀幸非邊吏之羞何在匹夫之命又此

賓游通無貨殖泰非韓起聘鄭私買玉環吳札過徐躬

要寶劔由來宴錫凡厥囊裝行役淹留皆已虛罄散有

限之微財供無期之久客斯可知矣且據圖刎首愚者

不為運斧全身庸流所鑒何則生輕一髮自重千鈞不

以賈盜明矣骨肉不任充鼎俎皮毛不足入貨財盜有

道焉吾無憂矣又公家遣使脫有資須本朝非隆平之時游客豈皇華之勢輕裝獨宿非勞聚櫟之儀微騎間行寧望輜軒之禮歸人將從私具驢騾緣道亭郵惟希蔬粟若曰留之無煩於執事遣之有費於官司或以顛沛為言或云資裝可懼固非通論皆是外篇所未喻三也又若以吾徒應還戾景戾景凶逆殲我國家天下含靈人懷憤厲既不獲投身社稷衛難乘輿四家磔蚩尤千刀剗王莽安所謂俛首頓膝歸奉冠雉佩弭腰鞬

為其草隸日者通和方敦曩睦凶人狙詐遂駭狼心頗
疑宋萬之誅彌懼荀瑩之請所以奔蹄勁角專恣憑陵
凡我行人偏膺讎憾政復道筋醢骨抽舌探肝於彼凶
情猶當未雪海內之所知也君侯之所具焉又聞本朝
公王都人士女風行雨散東播西流京邑丘墟薏蓬蕭
瑟偃師還望咸為草萊霸陵回首俱沾霜露此又君之
所知也彼以何義爭免寇讎我以何親爭歸委質昔距
平貴將懸重於陸公叔向名流深知於馮茂吾雖不敏

常慕前修不圖明庶有懷翻其以此量物昔魏氏將亡
羣兇挺爭諸賢戮力想得其朋為葛榮之黨邪為邢杲
之徒邪如曰不然斯所未喻四也假使吾徒還為凶黨
侯景生於趙代家自幽恒居則台司行為連率山川形
勢軍國彞章不勞請箸為籌便當屈指能算景以遁逃
小醜羊豕同羣身寓江臯家留河朔春井井如鬼如
神其不然乎抑又君之所知也且夫宮闈祕事竝若雲霄
英俊訐謨寧非帷幄或陽驚以定策或焚藁而奏書

朝廷之士猶難參預羈旅之人何階耳目至於禮樂訟
革刑政寬猛則謳歌已遠萬舞成風不知手之舞之足
之蹈之也安在搖其牙齒為間諜者哉若謂復命西朝
終奔東虜雖齊梁有隔尉候奚殊豈以河曲之難浮而
曰江關之可濟河橋馬度寧非宋典之姦關路雞鳴皆
曰田文之客何其通蔽乃爾相妨斯所未喻五也又兵
交使在雖著前經儻同狗僕之尤追肆寒山之怒則凡
諸元帥竝釋縲囚爰及偏裨同無翦馘乃至鍾儀見赦

朋笑遵途襄老蒙歸虞歌引路吾等張旌拭玉修好尋
盟涉泗之與浮河郊勞至于贈賄公恩既被賓敬無違
今者何憊翻蒙貶責若以此為言斯所未喻六也若曰
祆氛永久喪亂悠然哀我奔波存其形鬼固已銘茲厚
德戴此洪恩譬渤澥而俱深方嵩華而猶重但山梁飲
啄非有意於籠樊江海飛浮本無情於鐘鼓況吾等營
魂已謝餘息空留悲默為生何能支久是則雖蒙養護
更天年若以此為言斯所未喻七也若云逆豎殲夷

當聽反命高軒繼路飛蓋相隨未解其言何能善謔夫
屯亨治亂豈有意於前期謝常侍今年五十有一吾今
年四十有四介已知命賓又杖鄉計彼后生肩隨而已
豈銀臺之要彼未從師金竈之方吾知其訣政恐南陽
菊水竟不延齡東海桑田無由佇望若以此為言斯所
未喻八也足下清襟勝託書圓文林凡自洪荒終乎幽
厲如吾今日寧有其人爰至春秋微宜商略夫宗姬殄
隆霸道昏凶或執政之多門或陪臣之涼德故臧孫有

禮翻囚與國之賓周伯無憊空怒天王之使遷箕卿於
兩館繫驢子於三年斯匪貪亂之風邪寧當今之高例
也至於雙嶠且帝四海爭雄或構趙而侵燕或連韓而
謀魏身求盟於楚殿躬奪壁於秦庭輸寶鼎以託齊王
馳安車而誘梁客其外膏唇販舌分路揚鑣無罪無辜
如兄如弟逮乎中陽受命天下同規巡省諸華無聞幽
辱及三方之霸也孫甘言以斌媚曹屈詐以羈縻旂軫
歲到於句吳冠蓋年馳於庸蜀則客嘲殊險賓戲已深

共盡遊談誰云猜忤若使搜求故實脫有前蹤恐是叔
世之姦謀而非為邦之勝略也抑又聞之雲師大帝澆
淳乃異其風龍躍麟驚王霸雖殊其道莫不崇君親以
詔物敦敬養以治民預有邦司曾無隆替吾奉違溫清
仍屬亂離寇虜猖狂公私播越蕭軒靡御王舫誰持瞻
望鄉關何心天地自非生憑廩竹源出空桑行路含情
猶其相愍常謂擇官而仕非曰孝家擇事而趨非云忠
國況乎欽承有道驂駕前王郎吏明經鴈鷺知禮巡方

省化咸問高年東序西膠皆尊者耆耄吾以圭璋玉帛通
聘來朝屬世道之屯期鍾生民之否運兼年累載無申
元直之祈銜泣吞聲長對公閭之怒情禮之訴將同逆
鱗忠孝之言皆應齟舌是所不圖也非所仰望也且天
倫之愛何得忘懷妻子之情誰能無累夫以清河公主
之貴餘姚書佐之家莫限高卑皆被驅略自東南醜虜
抄販饑民臺署郎官俱餒墻壁況吾生離死別多歷暄
寒孀室嬰兒何可言念如得身還鄉土躬自推求猶冀

提携俱免凶虐夫四聰不達華陽君所謂亂臣百姓無
冤孫叔敖稱為良相足下高才重譽叅贊經綸非豹非
貌聞詩聞禮而中朝大議曾未矜論清禁嘉謀安能相
及謬謬非周舍容容類胡廣何其無諍臣哉歲月如流
半生何幾晨看旅鴈心赴江淮昏望牽牛情馳揚越朝
千悲而掩泣夜萬緒而回腸不自知其為生不自知其
為死也足下素挺詞鋒兼長理窟匡丞相解頤之說樂
令君清耳之談向所諮疑誰能曉諭若鄙言為戮來者

必通分請灰釘甘從斧鑊何但規規默默齧舌低頭而
已哉若一理存焉猶希矜眷何必期令我等必死齊都
足趙魏之黃塵加幽并之片骨遂使東平拱樹長懷向
漢之悲西洛孤墳恒表思鄉之夢于祈以屢哽慟增深
徐陵叩頭再拜

公私英華作公孫非西北東南作西柱東門機神作幾神無寄作无寄歌作音

英聲作英華戡定艱難作龕定京師斯其作斯所又晉
熙作又聞晉熙鑑鑑曉漏作鍾鍾曉噪非寶益作寶蓋
躡躡作躡履又近者邵陵王作不謂邵陵王綸名卿作
公卿晉熙廬江作又晉熙聚櫟作聚囊四冢作四家誤
千刀刺王莽作千鸞割王莽倪首作倪眉日者通和作
又日者偏膺作偏鍾公王都人作王都居人京邑作城闕

俱沾作皆沾何親作何熟有懷作為懷邪作也假使作
又假使景以作重以春春井井作鄉井鄉邑並若作春
若可濟作有濟寧非作曾非皆曰作皆是寒山作韓山
同無翦馘作同如恩禮妖氛永久作妖氛未久誤哀我
作哀悼戴此作載此營魂作營魄后生陳書作侯生誤
佇望作可望凡自終乎作凡自終于驥子作樂子寧當
今之高例作寧比當今之高列馳安車作憑安車斌媚
本魏帝謂孫權語作娥眉非旌軫作旄軫銘物作詔物
邦司作邦家亂離作亂罹誤源出作身出巡方省化陳
書作巡省方化誤將同作翻同蘇古英華作對舌非鄉
土作鄉壤非豹作非虎嘉謀作嘉謨平生作人生掩泣
作下泣夜作夕又作暮詞鋒作詞峰何必作何故增深
作良
深

在北齊與梁太尉王僧辯書

大清六年三月僧辯討平侯景時陵在北齊
與僧辯書及陵隨貞陽侯之入也僧辯得陵
甚喜接待饋遺其禮甚優以陵為尚書吏部
郎掌詔誥侯景寇京師陵父攜先在圍城
之內陵不奉家信便蔬食布衣若
居憂恤攜以憤疾卒故書稱孤子

太清六年六月五日孤子徐陵頓首昔者雲師火帝非
無戰陣之風堯誓湯征咸用干戈之道至於搖山蕩海
驅電乘雷殲厥兇渠無虧皇極若夏鍾夷羿周厄犬戎
漢委珠囊秦亡寶鏡然則皆聞之矣未有膺龍圖以建
國御鳳邸以承家二后欽明三靈交泰而天崩地坼妖

寇橫行者也自古銅頭鐵額興暴皇年檣杵窮竒流災
中國王彌石勒吞噬關河綠林青犢之羣黑山白馬之
衆校彼兵荒無聞前史八王故事曾未混淆九州春秋
非云禍亂我皇受命中興光宅天下泰寧瑣瑣安敢執
鞭建武栖栖何期扶轂抑又聞之陶唐既作天歸鳥喙
之臣豐畢將興特挺鷹揚之佐明公量苞金鉉神表玉
璜儼袞欽才平階佇德固以留連管樂惆悵風雲濡足
維時投竿斯在去歲兇徒不騁言次巴丘鼓聲聞一柱

之臺烽火照三休之殿公則懸麾羽扇猶對投壺戎羯
咸奔鯨鯢俱剪樓船萬軸還繫昆明胡馬千羣皆輸長
樂於是乎夏首西浮雲行電邁彭波東滙谷靜山空扼
鵠尾而據王畿登牛頭而掃天闕漸臺偽帥仍傳首於
帝京郿塢元兇咸剗腸於軍市青羗赤狄同畀豺狼胡
服夷言咸為京觀公園陵盡拜忠貫長沙神主咸安勲
踰高密重以秦宮既獲魯殿猶存闢綠草於應門開青
槐於武庫長安五陵之族鄠杜六遷之民襁負而歸都

壘斯滿膏脂藏脯遊騎擊鐘故市新城飛甍華屋東莞
舊宅人識桑榆南頓荒田家分禾黍豈以鄉名穀熟邑
號禾興而已哉若夫卦起龍文書因鳥跡勛勞王室大
拯生民自開闢以來未之有也雖十六才子明允篤誠
八百諸侯專心同德中宗佐命俱畫丹青光武功臣皆
懸星象棧道木閣田單之奉霸齊綰璽將兵周勃之扶
彊漢壤蟲之比黃鵠轍鮒之仰河宗未足云也孤子階
緣多幸叨造皇華鄉國屯危公私焦迫邳彤之切長亂

心胸徐庶之祈終無開允既而屏居空館多歷歲時釁
犯幽祗躬當勦滅何圖釁咎災極蒼旻號慕煩冤肝腸
屠殞酷痛奈何無狀奈何惟桑與梓翻若天涯杖柏栽
松悠然長絕明明日月號叫無聞茫茫宇宙容身何所
窮劇奈何自忝膺嘉聘仍屬亂離上下年尊偏嬰此酷
昔人迎門請盜恒懷廢寢之憂當輓輿櫬猶有危途之
懼況乎逆寇崩騰京師播越興居動止長隔山河朝夕
饘飩誰經心眼程縻不繼原粟何資瞻望風雲朝夕鳴

咽固乃遊魂已謝非復全生餘息空留非為全死同冰
魚之不絕似蟄蟲之猶蘇良可哀也良可哀也自東都
紹漢南毫興殷修好徵兵彌留星館韓宣范武方駕連
鑣蘇秦張儀朱輪華轂而孤子三危是擯四罪同科聽
別馬而長號杖歸旂而永慟王稽反命既無託乘之恩
椒舉相逢誰為班荆之位昔人違齊處魯時降徵求亡
晉奔秦猶蒙招請問管寧於遼左追王朗於浙東竝物
譽時賢卿門公族懸須應務深挾情祈斯豈庸賤之儔

耶非餘生之敢望也但預在輜軒誠為過誤珪璋特達
通聘河陽貂珥雍容尋盟漳水差有黃門啓封非無青
紙詔書羣將州司郊迎負弩鄉亭里候飾館陳兵豈是
復介而奔齊寧當竊妻而逃晉已焉哉羗難得其言也
漢之谷吉捐軀者幾人楚之申胥埋魂者何極孤子何
所歎焉但頓伏苫廬徒延光晷夫以啁噓鶯雀躑躅鳴
號含識懷靈未有其痛且夫曾耕雨雪猶尚悲歌蘇使
幽囚無馳哽噎公履忠弘孝冠冕縉紳化感煙雲量標

海岳行縻仲月王政無塞分穀高年仁風斯遠固以衣
纓仰訓黎庶投懷今日憔悴彌布洪澤雖復孤骸不返
方為漠北之塵營魄知歸終結江南之草孤子徐君頃
首文苑英華 英華注云君疑是古人自稱如王勣書
中亦作王君又一本作名當考今按作名是也豈有
稱孤子自署為君漢晉人別傳多不稱名稱君者以其
門人或故吏所撰耳今姑依原本 戰陣一作戰伐階
緣作實緣肝腸作肝腹羌作差曾耕一作魯耕誤
曾子雨雪曲見琴操無馳二字有誤漠一作漢

在北齊與宗室書

陵白臨淮負海是謂徐州顓頊高陽世有明德自興王啓

霸無勞委劍之鋒開國承家實饗彤弓之賜其後金
柯玉葉霞振雲從者舊通人茂才多士或以天下之貴
負石自沈王命之尊拂衣高蹈或熊衣雉製青組朱旗
儒盛江東文高河北或復分齊處魯移魏居燕瓜徙雖
遙芳枝無遠昔有王如王莽無關控鵠之宗劉曜劉淵
彌非偃龍之族又有朱家別錄邾子之苗何氏殊源韓
侯之胤三烏五鹿時事無恒東郭西門遷訛非一吾宗
雖廣未有駢枝咸自駒王同分才子正以金衡委御玉

斗宵亾胡賊憑陵中原傾覆我則供犧牲於東國載主
祐於南都二百餘年家于揚越此則盧諶不去裴寧仍
留高官燕秦遲迴鄉壤山河有隔叙覲無緣望冀馬而
增勞瞻賓鴻而永歎昔竇公累世先武稱其外家許都
遙遠靈王思其舊宅其言雖大可以喻小況在宗親寧
無停眷比月應雩龍星移殿烏天明和煦體中何如願
百年之老興居多福萬石之君寒暑清豫其外族忠孝
比屋連甍信義勇於干戈詩書甘於酒醴或有漁獵三

史紛綸五經都講開黌詩生負帙邦君佇德寧無掛榻
之思州將欽風應有題車之命南陽坐嘯寄以共治東
海行歌資其主弼梁竦不好徒為大言鄧禹平生惟望
如此若栖遲偃仰因事丘中桃李三名栗園千樹持竿
而釣徵聘不來負耒而耕公侯靡屈何其高也蓋復休
哉如脫推延或遲並問吾階緣人乏叨遙皇華王事無
淹公禮將畢既而揚都蕩覆方離獫狁之災越界風塵
復蹈輶軒之禮屏居空館多歷歲時疊犯靈祇招延禍

罰號慕無窮肝膽屠殞煩冤胸臆不自堪居無心柰何
無狀柰何自徘徊河朔亟積寒暄風患彌留半體枯廢
折臂為公雖非羊祜跛足而使無慙郤克固以形如槁
木心若死灰匍匐苦廬纔有魂氣夫迷山之客遲遙響
於巖崖窮海之賓望孤煙於洲嶼況乃宗均魯衛地匪
燕吳車騎相望舟艫朝夕三條不遠五達非難信乃闊
然遂不蒙問昔桃花之峽長避秦嬴芝草之山遙然滄
海猶復漁船可入何況平途不兼旬月勞懷既積輒命

行人弦望之間遲枉歸翰儻二三兄弟能敦昭穆之詩
求我漳濱幸問劉楨之疾陽春改節竝念將宜扶力為
書多不詮次陵白

者舊通人茂才多士一作者舊先賢
通人多士持竿作執竿復蹈作無復

為梁貞陽侯蕭淵明與太尉王僧辯

淵明初以南豫州刺史為大都督北伐軍敗
歸魏為散騎常侍及西魏與梁岳陽王營陷
江陵世祖見害太尉王僧辯司空陳霸先奉
元帝子晉安王方智以太宰承制齊受魏禪
文宣帝高洋使上黨王渙率眾送淵明還為
梁主前所獲梁諸將湛海珍等皆聽從書與
僧辯將屈壽陽僧辯拒境不納淵明往復致
書論還國繼統之意已而裴之橫戰死僧辯

乃啓納淵明於是齊師北反侍中裴英起衛
送淵明入建康即位改元天成立冬霸先襲殺
僧辯立晉安王是為敬帝以淵明為太傅建
安王齊人復徵淵明霸先將遣疽發背薨
徐陵傳陵為梁湘東王中記室叅軍兼通直
散騎常侍使魏齊受魏禪及送貞陽侯為梁
嗣達陵隨還淵明往
復致書皆陵詞也

淵明頓首頓首昔自天狼炳曜非無戰陣之風參虎揚
芒便有干戈之務至於夏鍾夷羿周厄犬戎漢委珠囊
秦亡寶篋彰於史籍可得而聞未有國家殲危遂若當
今者也我大梁膺龍圖而受命御鳳邸以承天軒頊比

於諸侯湯武方於兒戲三光有乂四海無波靈貺咸臻
表裏禔福非日非月蒼生仰其照臨如雲如雨天下蒙
其恩蔭而屯亨有數剝極為災梟獍豺狼肆逞允逆後
主誕資上聖光啓中興大剪仇讎方平宗社雖復瀟湘
舉斧庸蜀彎弓凡厥兇徒誰不殲撲豈圖天未悔禍喪
亂薦臻羗虜無厭乘此多難虔劉我南國蕩覆我西京
奉聞驚號肝膽崩潰雖復金行板蕩火政淪亡綠林青
犢之羣黑山白馬之卒八王故事曾未混淆九州春秋

誰去禍亂昔隆周徙播皆憑晉鄭之功彊漢貼危終假
虛牢之力今者武皇之子無復一人貌是孤孫還同三
叛等子頽而為暴同劉芳而入關乞命諸戎勢何支久
孤宗室之長爰自布衣皇運之初彌承天德何則據鞍
輟哭雖紹霸圖獨居掩涕終討家怨孤二三昆季方可
戴天被此恩慈如何酬答所以徐彭之役不吝輕軀哀
荷之誠久聞朝聽況復邦家不造至此橫流宗社無依
何所逃責因以提戈負劍卧泣行號言念荆巫志雪讎

耻大齊觀書有洛輯瑞榮河功格蒼旻德滿天地慈孝
之道通於百靈仁信之風覃於萬國是以日月所照舟
車所通候海水以來賓瞻蒼雲以奉貢昔自軒農炎昊
曾無宣國之規虞夏商周非有伐戎之略豈知華夷仰
德遠近同心穀價無堯湯之憂糧儲同水火之賤精兵
利器勢勇雷霆天馬龍媒量比山谷斯固開闢已來未
之有也至於親鄰之道夙契逾深無改曩懷增感彌篤
以為興亡繼絕事昞前經推擇庸虛命守宗禋方欲

仰憑神武清我寇讎
占喻難違諸懷更惡
明公誕膺時運
光贊本朝
勒瑞姜瓖書名何鼎
故以通期管樂冥契
風雲戮不世之渠兇
殲滔天之巨寇
重以三湘放命七
國連從征旅東西
必翦妖逆雖復棧道
木閣田單之奉
舊齊綰橐將兵周勃
之扶隆漢中宗佐命
俱畫丹青光
武功臣皆懸星象
非貌非虎之封
同心同德之勞
校彼
功庸曾何髣髴
但與存與亡期
於體國喪君有
君寧容
無主夙承所立
猶則孱蒙天步
方難寧可弘濟
自淹留

大國志荷恩私朝夕宮闈預奉顏色黃河白日亟宣誠
言分災卹患事非虛旨但善相小國終資大賢定我邦
家繫公是賴淮流不竭豈獨瑯邪望能喻此衷懷思之
無忽近陸居士有啓陳其禍亂朝旨即命河東王岳等
勤率羆熊便相抵赴道阻且長雖無之及所聞西浮夏
首便當險隘之衝南捍巴陵方拒窺窬之寇上黨王皇
齊寵弟是號宗英親御戎軒遠于將送裴侍中英起淮
南貴族兼事戎行躍冀馬者千羣披燕犀者萬隊來自

河陽曾不旬日持節徐武潼三州諸軍事散騎常侍明
達將軍東徐州刺史始興縣開國侯湛海珍等竝前朝
舊將夙著勲庸推轂海邊屬是喪亂雖復拔身有道志
雪朝怨咸預戎行共指鄉國江淮舊隸悉已招携方稟
英謨共翦讎難去月將晦便屆壽春已具舟師將臨江
浦使人入境行陳所懷撥日覘光遲在還牘當使宗祊
有主余同小白之勲家國無虞公保阿衡之貴何其美
也豈不休哉言念此私但以號咽蕭淵明頓首

方可一
作方爾

答王太尉書

姜常侍曷至復枉去月三十日告具公所懷良以慨息
孤雖庸薄不及通賢猶曰生民寧無心識自皇家禍亂
亟積寒暄九州萬國之人蟠木流沙之地莫不行號卧
泣想望休平何況於孤預在宗室家荷報雪之恩身蒙
鞠養之愛者先皇之慈也蒸嘗不絕於私廟子弟得嗣
於南藩者後主之惠也朱方之地建業之都誰家丘陵
誰家官廟豈有為人臣子荷此恩靈親執干戈自殉家

國公之忠孝信感人神公之盟誓事同懸象雖復宗盟不
造骨肉為讎安可相期盡如蕭管耶古者天子六軍是
為萬乘今日凶荒致闕斯禮偏裨將校尚握精兵州郡
官曹各有交吏未有居稱宸座行曰乘輿遂無五尺之
童高謝千人之長於公明允意復云何國家凋荒既乏
屯衛皇齊與睦幸惠優矜何乃自起超超苟違鄰德克
勘禍亂欲立功名咸自軍師豈在芻隸湛海珍等前朝
舊將差匪齊人分給羸兵即是梁甲非云背信豈曰渝

盟朝野羣雄何所攜貳且公天資命世再造皇家梁代之桓文蕭宗之伊管誰其遠近不稟英謨如有姦回正速齊斧尚何憂於共工何畏於有苗哉所覽來書既為疑難上黨王恭承朝旨不敢相同方篤鄰和不容全異如須減損更遲行人張廷尉種等所具此無多及蕭淵

明頓首

謨一作謀

重與王太尉書

淵明頓首頓首席威卿等還枉此月十四日告披覽未

周良深慨息昔長平建策猶聞蝕鼎之微疎勒効忠時
致飛泉之感豈在余涼德書不盡言遂使吾賢猶迷所
執斯故銜哀掩淚仍復披陳者也孤以庸薄寧有霸圖
戾服于周常懼盈滿豈望身居黃屋手御青綸揖讓而
對三靈端委而朝百辟詢諸圉牧莫不皆知援誓神明
固自無爽但大齊仁信之道關於至誠睦鄰之懷由於
孝德遂蒙殊獎歸嗣本朝拜首陳辭敦誘彌廣既而仇
讎未殄方憑大國之威宗祏貼危尤仰親仁之德僂俛

恩寄號醜惟深而勅諭分明信誓殊重乃云邦家有乂
社稷無虞凡廣陵歷陽皆許見還白水黃河屢奉然諾
至於夏藩衝要控遏上流且命彊兵為我臨據若其自
有精甲能捍醜徒並用還梁皆如前旨以孤頻經忝竊
屢守淮淝門生故吏遍於江右凡諸部曲竝使招携投
赴戎行前後雲集霜戈雪戟無非武庫之兵龍甲犀渠
皆是雲臺之仗文物以紀之聲明以發之斯實不世之
隆恩寧曰循常之恒禮則公固天所授弘濟本朝曲阜

同功營丘等烈若夫伊尹庖厨賤宰霍光階闥小臣諸
葛亮無應變之才管夷吾非王者之相論其世業較彼
勤勞書契已來罕有明德且程嬰之義自古為難荀息
之忠良以喜慰但先朝秉玉鏡之符御金輪之寶菩薩
之化行於十方仁壽之功沾於萬國兇人戾景遂殄邦
家何況於今亦有吳會江東如掌差匪虛言淮陽在面
方此非局不稼不穡多歷歲時大東小東全無機杼關
中醜虜寧非冒頓之鋒齊國彊兵便是軒轅之陣西

南當扼喉之勢東北承撫背之機首尾交侵華夷俱騁而冲人數歲復子方賒德未感於黎蒸威不加于將帥斯等怏怏非少主臣安有碌碌因人成事公之才具雖復明允勢何如於天監時何若於大同棄與國之隆恩當滔天之猛寇匡救之德翻未有從忠許之謀誰其相曉卧薪待火方此弗危繫草從風儔之非切若能思其上策審此英圖見引軫獵之車還向長安之邸一則二則惟在大賢外相內相終當相屈正當攜諸舊隸率我

賓游朝服簪纓直拜園寢梁人望國俱登赤馬之舟齊
師臨江仍轉蒼鷹之旆分袖南浦揚鞭北風民不疲勞
軍無怨讟如其執事尚秉前言將恐戎麾便濟江表何
則西浮夏首已據咽喉東進彭波次指心腹廣陵京口
烽煙相望魯柝聞邾方之尚遠胡桑對薊匹此為遙水
陸爭前龍虎交至則揚都蕩定功自齊師江左臣民非
關梁國豈不追慙後主崇寄之恩還負齊朝親鄰之意
東門黃犬固以長悲南陽白衣何可復得立茲幼弱非

曰大勲滅我宗祊何所逃豐今復遣前吉州刺史馬嵩
仁至彼更具往懷想不遠而復無貽祗悔也若英謨有
在方興祀夏之功明監如違便等過殷之歎存亡社稷

一在於公臨紙崩號不復多及蕭淵明頓首頓首

未周一作

未終建策作失策微作奇效作微時致作實致猶迷所
執作猶迷前報對作叶歸嗣作還嗣方憑作乃憑彌廣
作彌厲宗祊作宗社尤仰作終仰惟深作載深臨據作
此據若其作如其雲臺作靈臺寧曰作豈曰等烈作並
烈勤勞作勲勞良以喜慰作甚可嘉慰先朝作前朝仁
壽之功作仁壽之風淮陽作淮南便是作乃是西南作
東南東北作西北交侵作齊侵俱騁作俱逞復子作天
子黎蒸作神人斯等作斯曹少主下一有之字明允作

光明誰其作誰云非切作非匹英圖作英謀率我作
從我朝服簪纓作朝簪夕纓舟作山夏首作夏口東進
彭波次指心腹作東匯彭波披其心腹方之作方茲匹
此作比此爭前作俱前蕩定作薄定梁國作梁祚追慙
作還慙南陽作河南大勲作天助宗祊作宗祧逃豐作
逃責今復遣前吉州刺史馬嵩仁至彼作使指祇悔作
禍悔祀夏作嗣夏
公作斯忠許有誤

與司空陳霸先書

淵明頓首頓首軒轅既作遇蚩尤之兵顓頊為君阻共
工之亂雖復搖山蕩谷驅電乘雷殘厥兇渠曾靡遺孽
未有時當至治世在欽明元惡滔天遂陷邦家者我也

大梁開金繩之寶牒紐玉鏡之珍符功烈與造化相侔
德施與風雲俱遠戴日戴斗何向不賓太平之基無思
無屆逆賊侯景殲亂本朝釁重聰彌凶逾昇浞後主天
經地緯義冠人靈驅馭熊羆遂剪勅盜少康祀夏何可
對揚太戊興殷彌無等級不圖天未悔禍喪亂薦臻羗
賊憑陵侵蕩荆漢乘輿幽辱既陷兇徒黎獻崩騰莫不
淪沒故以哀窮兆庶痛極蒼旻者也夫諸侯釋位寧非
亂禍之朝宗子維城本濟殷憂之日武皇遺胄皆陷虜

庭乞命偷生何能支久孤宗室之長爰自布衣辛癸之
朝容身靡託追惟先業大庇生民既雪伯升之怨仍紹
桓王之霸孤二三昆季情禮獲申等預蕃枝偏承皇德
近歲彭都之役得備戎昭鞍甲之勞庶酬天寵況復邦
家不造至此橫流凶狡猶存何所逃責固以提戈負劍
卧泣行號言念荆巫志雪讎耻大齊德竝天地明符日
月隆禮詔俗張樂被民義感華夷仁侔造化玉羊銀甕
嘉瑞必彰澤馬山車禎符摠集若夫中原猛士本自無

窮沙塞精兵斯何有量是以家國之富文景所未儔兵
馬之強秦漢所未敵但親鄰之道既篤夙私明發之懷
彌敦先好以為興亡繼絕聖典通規爰命無庸嗣守社
稷既方憑大國庶討仇讎恩喻難違諸懷慙哽公體茲
懋德毗奉中興歸自番禺志在討亂至於雲行電邁谷
靜山空扼鵠尾而定王畿登牛頭而掃天闕漸臺徠帥
將傳首於帝京郿塢元兇皆橫屍於軍市高庸茂烈振
古希儔承此欣然深所嘉歎今者殷憂未已禍難相尋

宗社無依與主宜立夙承所眷尚在冲年王室猶難何
以康濟董侯幼弱終覆漢朝馬業童蒙仍傾晉室所謂
前事之不忘後事之龜兆也孤過荷恩靈預奉帷幄黃
河白日亟降誠言分災卹患事非虛旨但當小國之禮
無失敬恭闔境人民俱勞寤寐方窮人爵之重以報非
常之功惠覽今書希能留意也上黨王文高劉德武冠
曹彰爰降宗英遠于將送裴侍中英起贊奉師德俱事
戎間月壘連營雲旗蔽野同集江淮翼我歸旆湛海珍

等並前朝舊將夙著勲庸江左氛妖投身齊國今者皆
蒙恩獎竝在戎行歸附明公共剪讎難去月將晦便留
壽春已具舟艫將臨巢浦若公為內主方同國子之勲
余以定家得免臧孫之歎豈不功名富貴共保無疆前
望鄉關惟增號哭蕭淵明頓首頓首

戎昭一作戎行
何有一作有何

答王太尉書

此貞陽
答前書

姜勗至枉示具公忠義之懷家國喪亂于今積年三后
蒙塵四海騰沸天命元輔匡救本朝弘濟艱難建武宗

拓至於丘園板築尚想來儀公室皇枝豈不虛遲聞孤
還國理會高懷但近再命行人或不宣具公既詢謀卿
士訪逮藩維汭沂往來理淹旬月使乎屆止殊副所期
便是再立我蕭宗重興我梁國億兆黎庶咸蒙此恩社
稷宗祧曾不相愧近軍次東關頻遣信裴之橫處示其
可否答對驕凶殊駭聞矚上黨王陳兵見衛欲叙安危
無識之徒忽然逆戰前旌未舉即自披猖驚悼之情彌
以傷惻上黨王深自矜嗟不傳首級更蒙封樹飾棺厚

殞務從優禮齊朝大德信感神民方仰藉皇威敬憑元
宰討逆賊於咸陽誅叛子於雲夢同心協力克定邦家
覽所示權景宣書上流諸將本有忠略棄親向讎庶當
不爾防奸定亂終在於公今且頓東關更待來信未知
水陸何處見迎夫建國立君布在方策入盟出質有自
來矣若公之忠節上感蒼旻羣帥同謀必匪攜貳則齊
師反旆義不陵江如致爽言誓以無克韜旗側席遲復
行人曹冲奉表齊都即押送也渭橋之下惟遲叙言記

水之陽預有號懼

裴之橫答貞陽侯書

之橫字如岳河東聞喜人遠兒子

之橫白足下定國等至枉雅誨具高氏致送之旨即彼
行人遠到京城大慰應有天命但江山負阻未奉朝廷
報辭第下國之麟趾先朝所寄籍彼鄰好義深主祀自
宜單車入境端委還朝而朱旆啓行戎旌望國江東士
子未達高懷僕早預簪裾夙叨眷與弦矢既睽江淮成
阻青藜裁封雖斷西鳥之辭白雪在天豈無北風之歎

但變故紛紛忠貞宜顯寒松負雪誠愧節者之徒勁草
疾風寧忘烈士之槩齊師若反旆淮路還舍淝水彼之
敬送止縉紳之徒此之奉迎則軒蓋而已伏聽朝旨遲
申展敬之橫白

並文苑
英華

重與裴之橫書

淵明與上黨王渙至東關敬帝以之橫為
鎮北將軍都督衆軍出守鄆城沒于陣

張佛奴昨還得去月二十九日書覽以增慨昔桓公始
反管仲親射其車重耳初還呂卻終焚其室頃家國多

患頻遘閔山前事不忘便為龜兆所以皇齊大德禮秩
兼常威武紛紜洪恩汪濊況復旌旗照日鼓吹從風文
物俱華羽衛相鬱書契已來斯未有也卿天監之始門
宦有成承聖之初身名俱泰正應勤王効命酬二后之
恩憂國如家報三靈之寵何有方規異志苟樹童蒙阻
地險於長川忘天討之應及孤昔忝蕃維非無游士平
原之館乃乏如錐田文之家差有彈鋏雖李廣麾下莫
不封侯衛青故人多懷彼此豈可文辭簡略禮等平交

披封伸紙益多歎異相鼠無儀表詩人之作茅鷃刺傲
彰魯史之文宿昔相期不應如此衆軍即便頓江關相
見在近不復多及蕭淵明頓首再拜

陳霸先答貞陽侯書

英華亦作徐陵代答非

初齊之請納貞陽也霸先以為不可遣使
詣僧辯苦爭之往反數四僧辯竟不從

某頓首頓首使人孔文端至奉此月四日誨兼翰累牘
俯加循覽以悲以慰先皇聖德在躬體道康哲允恭克
讓就日望雲玄雀銜書皇天眷命光宅區宇司牧黎元

澤與風行恩隨雨散朔南暨教要荒貢篚而運鍾百六
時屬陵夷賊臣戾景內興中國掘剪公室鞭撻寓縣三
光掩曜四海分崩嗣后大孝發衷志清國豐載齊車以
誓衆墨衰裳而鞠旅遙授兵略沿流電邁不崇朝而戮
封豕纔信宿而剪奔鯨雖天未絕梁伊帝之力方欲克復
梁雍吞滅峭函即都渚宮將議進取而穹昊不惠頻降
愍凶秦氏虎狼肆其虐暴主上幽辱鑾輿播遷悲結萬
姓痛深九服社稷須主天下難曠晉安殿下地惟密戚

親實愛子弱表狗齊幼而岐嶷羣公卿士岳牧藩鎮莫
不頓首屈膝請嗣宗祧王太尉秉德居宗實為元輔僕
以不敏預叅末將今朝野寧宴方鎮協和戮力華夷同
獎王室庶竭股肱蕩刷讎讐豐殿下夙標令譽早播明德
親則章興地惟邢蔣昔因多故託身大國今蒙發勅已
次壽春載披來旨實深傾注但帝子承制非為乏主冢
宰匡翊寧侯長君雖則未學頗聞前載成王踐阼曾未
壯年昭帝君臨實惟童孺若以家國多故思濟艱難仰

惟尊戚莫不屬望分陝之寄側聽高旨如使不繼親地
便議崇極上相居中自當奉報昔仲子舍孫檀弓有作
趙求外主穆嬴以啼前事不忘可為故實蕃維末鎮敢
用多陳遠降誨函惟深哽佩陳某頓首頓首

陵夷一作
也夷發哀

一作發哀章興謂朱虛侯章
東牟侯興居一作章典誤

又答僧辯書

僧辯因求以敬帝為皇太子貞陽又答僧辯
書使送質于鄴已渡江乃踐偽位仍授僧辯
大司馬領太子
太傅揚州牧

王尚書通至復枉示知欲遣賢弟世珍以表誠質具悉
憂國之懷復以庭中玉樹掌內明珠無累胸懷志在匡
救豈非劬勞我社稷弘濟我邦家慙歎之懷用忘興寢
晉安王東京貽厥之重西都繼體之賢嗣守皇家寧非
民望但世道喪亂宜立長君以其蒙孽難可承業成昭
之德自古希儔冲質之危何代無此孤身當否運志不
圖生忽荷不世之恩仍致非常之舉自惟虛薄兢懼已
深若建承華本歸皇冑心口相誓惟擬晉安如或虛言

神明所殛覽今所示深遂本懷戢慰之情無寄言象但
公憂勞之重既稟齊恩忠義之情復及梁貳華夷兆庶
豈不懷風宗廟明靈豈不相感正爾迴旆仍向歷陽所
期質累便望來彼衆軍不渡已著盟書斯則大齊聖主
之恩規上黨英王之然諾得原失信終不為也惟遲相
見使在不賒鄉國非遙觸目號咽

並梁書

又答僧辯書

周尚書弘正張廷尉種姜常侍曷等至枉此月二十六

日告并遣賢弟子世珍賢子顯等具忠款之至公養孤之恩愛甚鄧侯少子之懷情深張禹豈非憂勞社稷用忍肌膚天下含靈誰無悲愧余遭家不造敬累吾賢言念忠誠益以號咽但皇齊大德過見憂矜微借輕兵以垂將送意謂江東凋弊累積寒暄供膳資儲理當多闕輒白上黨王止請三千人二百疋而已凱衆人殊尚有疑難將恐諸士未喻雅懷今復命周尚書及姜常侍還彼具陳一二夫以受為冠非有晉邦不送為譏終無楚

國五千步卒既謝李陵三千羸兵亦等無忌公之明義
理不為嫌行人失辭尚停然諾臨江攄轡企望音郵惟
遲來書此不多具蕭某白

與北齊荀昂兄弟書

此入梁後與昂兄弟勸使
歸梁昂疑前隨貞陽在齊

張佛奴至未枉還告但以勞悒夫興亡繼絕往帝之通
規分災恤患聖王之恒典自敦龐既散詐偽萌生時託
親鄰信有澆慝大齊道冠三皇風高九代仁信之本關
於至誠言與之恩由於孝德孤謬蒙殊獎還嗣本朝勅

諭分明言誓殊重若使邦家克定境內無虞凡廣陵歷陽皆許見還白水黃河屢奉然諾彞章禮數莫不優華斯乃不世之殊恩寧是悠常之恒事王太尉勲踰呂望德冠伊衡凡厥英謀美靡遺策豈容當滔天之巨寇違大國之隆恩計彼賢明必當不爾卿維兄及弟莫非雄才江外風塵不染光冠賈氏三虎豈獨貴於前修荀家八龍信服在於今日近者州司不道或致流言朝聽矜明已如前及想謀元宰善保良圖南道主人以相

付也見所答東海徐湛書粗具來意昔桓憑苦衆文用
秦攻是假鄰國之威以備非常之變若使江東宰匠具
領齊恩時命封疆遠相迎接故當携諸舊隸率我賓游
朝服簪纓直拜園寢梁人望國自合水而浮舟齊師言
歸指滄江而迴旆如其彼相未悟良機將恐戎麾遂踐
京邑若其求成取敗豈謂和風龍馬雲旗差不相涉一
二復令張佛奴口具相見在近此不多及蕭淵明疏

並三

國典錄 悠常一作
尋常秦政一作秦政



陳文紀卷四